



partii naleraq

UKA 2015/44-01

21.10.2015

Kalaallit Nunaanni kræftimik eqqugaasunut sungiusaqqittarfimmik pilersitsinissamut siunnerfilinnik iliuusissanik pilersaarusiornissannik Naalakkersuisut kingusinnerpaamik UPA 16-imi peqquneqarnissaannik siunnersuut.

(Inatsiartunut ilaasortaq Agathe Fontain, Inuit Ataqtigiiit)

Inatsisartunut ilasortatp Agathe Fontain-ip Kalaallit Nunatsinni kræftimik eqqugaasunut sungiusaqqittarfimmik pilersitsinissamut siunnerfilinnik iliuusissanik pilersaarusiornissannik Naalakkersuisut kingusinnerpaamik UPA 16-imi peqquneqarnissaannik siunnersuutaa Partii Naleqqamiit imannak oqaaseqarfigissuarput.

Nappaammik kræft-imik eqqungaasimassunut sungiusaqqittarfimmik pilersitsinissamut siunnerfilinnik iliuusissanik pilersaarusiornissannik siunnersuut Partii Naleqqamiit tamakkiisumik taperserparput.

Aallaqqaasiulluguli Partii Naleqqamiit assut pingaartillugu oqaatigissuarput; inuit kræft-imik nappaateqalersimasut imaluunniit nappaammut tassunga ilimanaateqarsinnaasumik assingusumik anniaateqalersimasut, napparsimasullu allat napparsimmaveqarfimmut saaffiginneqqaataaniilli pimoorunneqarlutik uteqattaartinneqaannaratillu sullinneqartarnissaat naalakkersuinikkut qulakkeerneqartariaqartoq piumasaqaatigineqartariaqarmat.

Isumaqarpugut taamaaliornikkut aamma inuit annerusumik napparsimalersinnaasarnerat katsorsarneqarnissamillu pisariaqartitsisalertarnerat minnerpaaffissaaniitinneqarsinnaasoq, tassami nappaat sunaluunniit pileqqaarneraniit pitsaasumik katsorsarneqarpat tamanna napparsimalersimasumut peqqinnissaqarfimmut inuiaqatigiinnullu akikinnerullunilu pitsaanerussammat.

Soorunami tamatta nalungilarput nappaatit sulluunniit pinaveersimatinneqarnissaannut sapinngisarput tamaat naapertorlugu suleqataasussaalluta, kisianni aamma nappaat sunaluunniit kinaangaluartumulluunniit ullormiit ullormut takkussinnaasarpoq.

Taamaattumik inuiaqatigiinni toqqissisimasumik inooqataanissamut aamma peqqinnissaqarfimmiik pissusissaq eqqorlugu sullinneqarnissaq peqqinnissaqarfiup pisussaaffigimmagu eqqaamasariaqarparput, tassami assersuutigalugu, qanittunnguaq allaat tikillugu tusagassiutitigit nalunaarutigineqarpoq; nunatta ilaani innuttaasut ilaat sunaaffu ukiuni arlalinni kræft-imik nappaateqalersimasoq, piffissaangallartillugu nappaataa paasineqarsimanngitsoq, naak inuk pineqartoq peqqinnissaqarfimmut arlaleriarluni saaffiginnittarsimangualuortoq.

Assersuut alla atuagassiami “Kalaaleq”-mi nr. 8-mi aggust/septembari 2015-imi allaaserineqartoq Partii Naleqqamiit issuaaffigilaassuarput:

Qulequtaqarpoq “Assigiingissut”:

“Inuit arlallit nakorsiartariaqalersarput. Aasaq manna misigisannut ilaagujoq Danmarkimi napparsimmaviit ilaannut unitsiarneq. Misigisap isumaliutit arlallit uanni pilersippai ilaatigut napparsimalersunik misissueqqaarnermut tunngatillugu.

Tassaana feeriami perululerluna saaffiginnikkama tupigiummeriga Danmarkimi nakorsiarnermi ileqqusorisara inuup nakorsiartup ilumut nappaatillittut isigineqarluni misissorneqalersarnera. Unitsinneqarnissaq aaliangiunneqartorlu peqqiilliuttip suusinnaaneranik paasiniaaneq sukumiisoq aallartittaraat, soorlu aap tillertera naqitsineralu, kissarneq, aaversinneq il. II. Minnerunngitsumillu apersuutigisaraat qanga taamaalinerup aallartinnera sunillu nalaataqarsimaneq, siunertarigunarlugu peqqiilliut eqqortoq sunaanersoq paasiniarluarniarlugu, katsorsaaneq eqqortoq aallartinniassammat.

Ukiut marlussuit matuma siorna Sanap perululersunut saaffiginnittarfianut saaffiginnittarnera eqqaallugu sanilliuppara. Tassannga qasseeriarluna angerlartinneqartarpunga misissuineq amigarsorineqartoq aaviinertaqanngitsorlu pereersorlu”.

Taama qisuariaateqarnitsinnut pissutaanerpaajuvoq, soorunami siullertut innuttaasut toqqissisimasumik pissusissarlu eqqorlugu kiffartuunneqarnissaat pingaartikkatsigu aammalu Peqqinnissaqarfiup pitsaanerpaamik sullissisarnissaa qulakkeerneqartariaqarmat.

Isumaqarpugut taamaaliornikkut aamma siunnersuummi sullitassat sullissiumaartussallu oqilisaaffigineqarsinnaallutillu suliassanik oqinnerulersitsineq anguneqarsinnaasoq.

Nappaammik kræft-imik eqqungaasimasunut inuunermi nalinginnaasumik ingerlariaqqinnissaannut pitsaanerpaamik sungiusarfissaqalersinnaanissaannut tunngatillugu inuup peqqissilluarnissaa pingaarnerpaatut salliutinneqarnissaa Partii Naleqqamiit assut pingaartipparput, tassami inuit taama

eqqungaasimasut sapinngisamik ernumanangitsumik inuuneqarnissaat qulakkeerneqartariaqartoq isumaqarpugut.

Taama oqaaseqarluta siunnersuutip aappassanneerneqannginnerani ataatsimiitaliami susassaqartumi suliarineqarnissaa inassutingaarput.

Anthon Frederiksen